




1 4  
1544  
155






14

1544

155





14

154

155



綿州李雨村著

# 淡墨錄

萬卷樓藏板

淡墨錄者所紀皆 本朝甲乙兩榜諸名臣之言行也余舊有 人物總志百卷篇帖浩繁故先摘其要者以問世大抵皆翰苑之名言科場之條例不微較事並述奇聞自國初起每科俱按題名碑金石而康熙己未乾隆丙辰兩舉博學鴻詞得人尤盛亦併逐一搜羅詳為考釋編成共得十六卷禮曰史載筆士載言余非敢然也聖人有言賢者識其大者不賢者識其小者遭逢 聖世賢良輩出多千載罕見之曠典未有之奇逢不有紀錄何由窺其原委悉其廣大夫是將至而猶云忘記載也夫述而不



作雖聖人且然況下焉者乎故此編欽遵 綸書謹  
依 功令抽中秘之書採故老之傳不但備詞林典  
故聊以續玉堂嘉話云爾則閱者以此爲言行錄也  
可以此爲則例編也可至淡墨善榜不知始自何時  
或云唐李程應舉時遇天榜吏問登第人姓則有李  
和而無李程蒼皇求之乃用淡墨筆添王字於和字  
之下果得第後遂相因凡榜書人名俱用淡墨遂成  
故事又賈公談錄唐李紳侍郎知貢舉夜放榜書未  
畢書吏忽得暴疾因更呼一善書吏代吏方醉磨墨  
鹵莽一榜字或濃或淡反致其妍二者未知孰是云

乾隆乙卯初冬上浣綿州雨村居士李調元撰



淡墨鈔卷一

國初館閣官制

天聰初年設立文館十年改文館爲內三院一國史院二秘書院三宏文院各設大學士一員學士一員崇德元年以剛林領國史院大學士范文程領秘書院大學士希福領宏文院大學士學士以羅碩詹霸胡球分領之順治十五年九月改內三院爲殿閣一中和殿二保和殿三文華殿四武英殿五文淵閣六內閣十六年初以費維巴納哈爲中和殿大學士額

蜀綿 李調元 兩村



色赫爲保和殿大學士蔣赫德爲文華殿大學士洪承疇爲武英殿大學士文淵內閣未補人裁三院學士官另設翰林院掌院學士一員以折庫納爲之十八年七月復改殿閣爲內三院仍設學士裁內三院其六月以前與十七年同康熙九年復改內三院爲殿閣復設翰林院

### 翰林所掌

大清會典翰林官員職在侍從 禁庭進直 講筵記注起居撰擬 冊誥等文纂修 國史諸書順治元年置翰林院爲正三品衙門設漢學士一員侍讀

學士侍講學士各二員侍讀侍講各二員修撰編修檢討庶吉士俱無定員典籍二員孔目一員二年裁翰林院以翰林官分屬內三院十五年復置翰林院設滿漢掌院學士各一員兼禮部侍郎銜漢侍讀學士侍講學士各三員漢侍讀侍講各三員修撰編修檢討庶吉士俱無定員滿漢典籍各一員滿侍讀四員漢侍讀二員滿漢孔目各一員滿文筆帖式八員滿漢文筆帖式八員十八年復裁翰林院康熙九年仍置翰林院員額與順治十五年同增設滿侍讀學士侍講學士侍讀侍講各三員裁滿侍讀二員增設



文筆帖式八員漢軍筆帖式八員十一年增設滿文筆帖式十四員滿漢文筆帖式十員

本朝開科舉人

天聰八年四月 太宗文皇帝命禮部考取通滿洲蒙古漢書文義者為舉人取中滿洲習滿書者剛林敦多惠滿洲習漢書者察不害恩國泰漢人習滿書者宜成格漢人習漢書者齊國儒朱燦然羅繡錦梁正大雷興馬國柱金柱王來用蒙古習蒙古書者俄博特石岱蘇魯木共十六人俱 賜為舉人各賜衣一襲免四丁宴於禮部崇德三年八月 賜新

中式舉人羅碩常鼐胡邱阿濟格畢禮克圖王文奎蘇宏祖楊方興曹京張大任于變龍等十名朝衣各一領授半箇牛象章京品級各免人丁四名六年六月內三院大學士范文程希福剛林等奏以滿漢蒙古士人考取秀才並舉人秋七月 賜新中式舉人滿洲鄂貌圖赫德蒙古杜當漢人崔光前下三元章于天下為鳳各綴朝衣一領當是時取士之額雖少而名臣多出其中

滿洲科目解元

賽圖字麟閣滿洲科目解元幼而貧常藝馬通讀書



尤好為詩滿洲文學之開實自公始而滿洲文字則創于達海公特諡文成云

沈文奎為盛京開科進士

本朝 太祖肇造丕基 太宗用范文程議特

選於 盛京沈文奎登第一名為進士開科之始盛京志

文奎字清遠本浙江會稽人世居曹娥村少習舉

子業小試不遇客遊遵化值大兵破城挾之行遇

太宗登第一充秘書院纂修官順治元年扈從入關

上命巡撫畿南又 命總督漕務時當初定江淮

多伏莽文奎綏來有方民甚賴之自客遊至此與母

妻相隔十八年拜疏迎養骨肉復完擢宏文院學士充會試副總裁丁艱再督漕時膠州將海時行叛率先會勦晉兵部尚書予廕以白糧愆期鐫級為陝西糧儲參政乞休卒年五十七紹興府志是本朝進士開科第一人實自沈文奎始

丙戌丁亥再行會試

范文程本朝開國元勳文臣第一人也字憲斗號輝

嶽漢軍鑲黃旗人宋仲淹後由江西樂平遷瀋陽曾

祖總明進士累官兵部尚書以仇直忤嚴嵩去祖沉

為瀋陽衛指揮同知父楠生子二文程其次也少穎



敏沉毅讀書輒通大義年十八與兄文案並爲生員  
天命三年大兵克撫順文程偕兄來歸 太祖偉  
其貌詢知其家世顧謂諸貝勒曰此名臣後也善遇  
之天聰三年以文館官從 太宗征明有功是時  
文館內尙未有大學士職銜而文臣所領皆樞密事  
每入對必漏下數十刻始出或未及食息復奉召入  
率以爲常崇德元年改六館爲內三院 特授文程  
秘書院大學士每議大政必資籌畫宣諭各國 勅  
書皆出文程手三年更定部院官制奏請各衙門只  
宜設滿洲承政一員以下酌量設左右叅政理事官

副理事官額者庫各官共爲五等八年始撥文程隸  
鑲黃旗是歲 世祖章皇帝嗣位明年爲順治元  
年四月闖賊陷明北京明山海關總兵吳三桂來乞  
師遂驛召文程於蓋洲之湯泉決策進兵時文程方  
抱病力疾趨 盛京建議曰自闖寇猖狂中原塗炭  
近且傾覆京師戕厥君后此必討之賊也雖擁衆百  
萬橫行無憚揆其敗道有三通殞其主天怒矣刑辱  
縉紳拷劫財貨士忿矣掠民貲淫人婦火人廬舍民  
恨矣備此三敗行之以驕可一戰破也我 國家上  
下同心兵甲選練誠聲罪以臨之恤其士夫拯厥黎



庶兵以義動何功不成復言好生者天之德也兵者  
聖人不得已而用之自古未有嗜殺而得天下者  
國家止欲帝關東當攻掠兼施倘思統一區夏非又  
安百姓不可於是大軍遂發文程扶病隨征申嚴紀  
律妄殺者有罪二十二日敗流賊兵二十萬於山海  
關我兵長驅而西民多逃匿文程爲草檄宣諭言義  
兵之來爲我等復君父仇非殺百姓也今所誅者惟  
闖賊官來歸者復其官民來歸者復其業必不汝害  
民心遂安凡檄皆署文程官階姓氏師入燕京文程  
建議首先爲明愍帝發喪易梓宮備儀衛文程親紀

其事中原既定上疏言治天下在得民心士爲秀民  
士心得則民心得矣今宜廣其途以蒐之乙酉丙戌  
通籍者皆江北士請於丙戌丁亥再行鄉會試於是  
江以南士子畢集得人稱極盛焉康熙元年祭  
太宗陵伏地號慟幾不能起五年八月初二日卒賜  
葬紅螺山 御製碑文題於墓道謚曰文肅見八  
旗通志

丙戌北京首科狀元

國朝定鼎燕京順治三年丙戌爲龍飛首科狀元傅  
以漸山東聊城人授修撰官至大學士榜眼呂纘祖



直隸滄州人授編修官至侍講學士探花李與棠大  
興人又會元也授編修官至司業是科會試首題百  
姓足君孰與不足百姓不足君孰與足次見而民莫  
不悅三王道之始也元墨渾穆蔚然開國氣象時三  
藩未定故無遼五省人而國初諸大老皆出此科  
如蔚州魏果毅公象樞字環極立朝清慎爲本朝理  
學之宗栢鄉魏文毅公裔介字石生贊襄恪勤尤能  
博綜經史高陽李文勤公霽字景雷風度端凝老成  
持重朝野倚以爲重國初大典禮皆出其手尤精  
字學嘗謂古無查字作察核解者查者察之轉也今

票本及文移俱用查字不典奏明請將查字盡改察  
字從之是皆庶吉士至大學士者也

丙辰補選前明庶吉士

順治丙辰補選前明庶吉士七人王崇簡順天宛平  
人杜芳直隸長垣人周爰訪山東寧陽人張丕吉山  
東嘉祥人魏天賞河南遂平人喬庭桂山西解州人  
岳映斗陝西三原人皆崇禎癸未進士

丙戌得人最盛

順治丙戌首科得人最盛大拜四人傳聊城以漸李  
文勤蔚魏栢鄉裔介丙戌會試丁亥殿試馮文毅尙



書八人沙宗伯澄高司寇景傅司空維鱗冀司空如錫朱司空之弼艾司寇元徵魏敏果象樞劉端敏樾督撫尙書三人袁清獻懋功朱河督之錫林漕督起龍左都御史一人劉遷安鴻儒侍郎十五人李宗伯爽棠石司農闕張司寇爾素陳司農協王司空天眷胡少宰兆龍梁少宰清寬梁少宰清遠田司農六善楊司馬時薦于司寇嗣登朱司農裴李司馬棠馥楊司空運昌王司農度左副都御史一人董洛陽篤行巡撫右副都御史一人張閩撫沂通政使二人管洪洞淑軾劉羅山士蘭大理卿一人王文安景祚本名內

院學士一人夏葢九敷九

詞臣出爲監司之始

藍潤字鳧渚卽墨人順治三年丙戌進士由庶吉士至侍讀榜本名滋至是特賜名潤性廉介不異儒素故事直隸江南皆以臺員視學上特簡詞臣以潤爲上江學使盡剔積弊世祖每顧廷臣曰居官如藍潤可法也會直省監司多不稱上以翰林官習治法度以潤品行清端遂出爲福建參政督糧儲尋遷布政使落職嗣後詞臣出爲監司皆相繼召用惜潤已前卒



探花爲僧

順治四年丁亥鼎甲狀元呂宮字長音武進人官至  
宏文院大學士榜眼程芳朝字其相桐城人官至太  
常寺卿探花蔣超字虎臣金壇人以編修督順天學  
政事竣卽告歸不過里門沂巴峽至峩眉寓伏虎寺  
于癸丑正月端坐說偈而逝偈曰由來猿鶴自相親  
老衲無端墜孽塵妄想鑊來避熱却從大海去翻  
身功名傀儡場中物妻子骷髏隊裏人只有君親無  
答報生生常自祝能仁時年四十九超生時其祖母  
憂峩眉老僧而生故幼不茹葷先是有術者言超壽

止四十九故爲詩四十九篇至是果符合云

會元不與館選

丁亥會元李人龍字震陽滄洲人歎明末文運之弊  
力變其格歸于正宗舉第一授定遠令會元不與館  
選自人龍始

真翰林

馮文毅公溥字易齋山東益都人明崇禎己卯舉人  
本朝丙戌開科進士丁亥補殿試二甲十一名改庶  
吉士由編修陞侍讀學士是時 聖祖屢幸內閣  
一日指溥謂諸大學士曰馮溥真翰林也官至大學



士

漢翰林習滿語

魁平王文靖公熙字子雍順治四年丁亥登進士年  
 甫二十改庶吉士習滿書拔前列 世祖召見宏  
 文院命以滿語奏對大加褒賞尋陞國子監司業復  
 諭閣臣王熙既為司業恐其荒于滿書可傳 諭祭  
 酒姑爾馬昨同署問答皆以滿語勿令間斷甲午命  
 譯書經兼為滿學士講解本章秋陞洗馬冬 召入  
 南苑譯勸善書及大學衍義一日 世祖猝至直  
 幄閱熙所譯書 諭閣臣稱善久之遂令長直南苑

復試滿書第一陞庶子後官至大學士與同榜益都  
 馮溥同鄉寶坻杜立德俱稱一時賢相

題請科場處分別例

黃文僖公機字次辰順治丁亥進士改庶吉士歷任  
 吏禮等部尚書時 世祖自江南丁酉後嚴科場  
 積弊凡卷有小疵俱罹大獄機題請科場處分別例  
 俱從寬條 聖祖時紳矜以逋賦褫革者不可勝  
 計俱擬解部勘問機請就近究治不必遠解株連議  
 者或欲罷科目機力持不可乃罷制藝而用策論機  
 與王熙復以八股發聖賢心傳請復舊制 上俱從



之機工書法奉

旨書御屏金箋書額俱稱

社稷臣

李文襄公之芳由順治丁亥進士官至文華殿大學士剛正沉毅總督浙江時平定耿逆不動聲色以身繫天下之重使數千里危而復安古稱社稷臣之芳之謂歟是科名臣如湯陰端偃尚書王伯勉霸州郝恭定向書 維訥皆是也

殿試不用四六自劉子壯始

先是廷對策俱用四六舊套順治初開科傳以漸首魁天下亦仍其習至順治六年己丑科 世祖始

臨軒親策制曰從古帝王以天下爲一家予自入中原以來滿漢曾無異視而遠邇百姓猶未同風豈滿人尙質漢人尙文習俗或不同與抑音語未通意見偶殊畛域尙或未化與今欲聯滿漢爲一體使之同心合力歡然無間何道而可要言可行不用四六舊套予將親覽焉子壯對曰臣聞人君致治在力行不在多言人臣進言與其文毋寧過質夫帝王以天下爲一家則滿漢皆一家也 朝廷雖無異視而百姓不能不異也卽滿人漢人不能不相異也百姓之所以異視者何也邊防之外愚懦之民見一滿人則先



驚之矣又有挾之爲重者以相恐其實滿人之與漢人未嘗不愛也處事未嘗不明守法未嘗不堅也居身未嘗不廉也而小民預有畏怯之意雖其極有理之事嘗恐不能自直於前則其勢不能以卒合而又時當變革之初民重其生是以雖有相愛之誠而不敢相信雖無有相凌之意而先以自怯也此百姓之所爲異也滿漢之不能不相異者何也滿人有開創之功其權不得不重滿人有勤勞之績其勢不得不隆漢人雖處尊貴之位力固不敢相抗志固不能必行也其中自專者未免輕漢人爲善狡爲朋交其中自

疑者未免懼滿人之多強之多勢是以有懷而不能相喻有才而不能自盡也此滿漢之相爲異也今欲去其異而同之臣謂滿人尙質以文輔之漢人尙文以質輔之其以文輔之者設滿學焉或於國子監或於教習庶吉使讀四書以通其理觀通鑑綱目以習其事限爲歲月以考之亦可以知奉教之人卽爲他日奉法之人又可以察其才之所堪以爲選授之地其樸者教之禮數以知謙讓通之市易以知義利同之好惡以達其意通之交遊以習其情日漸月積至于化而相忘矣其以質輔之者凡在官以實事責之



選授之公於所選之人參舉多少知之錢穀之任於所掌之務出入清慎知之司教者於風俗美惡人才盛衰察之典戎者於民生安擾盜賊平定察之監司以屬吏奉法舉效當可爲考有司以土田開墾民人歸業爲課凡在民以實心責之如往來毋以其少文而畏其難近如事理毋以其好勝而懼其相侵如貿易毋疑其貪狼而設爲冒欺如居處毋厭其鄙固而多所棄遠如是則習俗雖不同道德同之也音語雖未通氣類習之也義見雖偶殊義理達之也一文一質方將變通古今轉移造物而有何不化之畛域哉

抑臣所祈者願復古日御便殿之制令大臣如唐虞君臣論道取內外章奏面相議訂諫官仍得於仗下封駁則上下情通滿漢道合中外權均宰相不僅以奉行爲職卿貳不僅以署紙爲能則中心隱微皆可告語而海荒萬里如在目前此古和衷之休也又何遠近百姓之風不可同與子壯對策旣畢 世祖大悅親定第一甲第一名授國史院修撰所言經筵滿學教習屯衛諸大政悉著令甲次第舉行之壬辰分校禮闈癸巳卒年四十四著圮思堂集

子壯異夢



劉子壯者世居團風鎮少穎慧讀書一目數行下屬  
文奇肆弱冠登崇禎庚午舉人初登後夢一人語之  
曰爾須朱之弼作房考方中春榜及到京師偶出寓  
散步見數童子攜書包經其門一童子最秀出遂執  
其手與談見其書上寫學名朱之弼也大驚隨至其  
家見其父乃開柴做主人因與款曲將筆硯數事贈  
之後遭流寇之亂屢次不赴春官及本朝順治六  
年己丑會試之弼已爲禮垣分校得首卷即子壯也

熊劉

熊伯龍己丑榜眼與子壯齊名人稱熊劉官編修甲

午典試浙江一榜得狀元三人乙未鄞之史大成甲  
辰歸安之嚴我斯庚戌德清之蔡啟傅是也官至祭  
酒探花張天植字次先秀水人由編修至太常轉通  
政端午世祖召入龍舟賜宴人以爲榮官至兵  
侍

兩次會試俱中一百六十二名

巢震林字五一武進人順治壬辰會試中一百六十  
二名以磨勘革去乙未會試復中一百六十二名毫  
釐不爽信有定數也

初設八旗科舉例



大清會典順治八年六月禮部議准八旗科舉例凡  
遇應考年分鄉試取中滿洲五十名蒙古二十名漢  
軍五十名各衙門無頂帶筆帖式亦准應試滿洲蒙  
古識漢字者繙漢字文一篇不識漢字者作滿字文  
一篇漢軍文章篇數如漢人例會試取中滿洲二十  
五名蒙古十名漢軍二十五名各衙門他赤哈哈番  
筆帖式哈番俱准應試滿洲蒙古識漢字者繙漢字  
文一篇作文章一篇不識漢字者作滿字文二篇漢  
軍文章篇數如漢人例八月上 皇太后尊號恩  
詔內一滿洲蒙古漢軍舉人於順治九年會試原額

取六十名今加額二十五名禮部言今科順天鄉試  
取滿洲舉人五十名蒙古舉人二十名主考應用滿  
洲內院禮部官各一員漢軍舉人五十名聽漢主考  
官閱卷又監生額數既加三十八名應增漢房考官  
二員至漢軍文字本年鄉試明年會試第一場書義  
二篇經義一篇如未通經者作書義三篇二場論一  
篇三場策一道順治十一年鄉試十二年會試第一  
場書義三篇經義二篇二場論一篇判五條三場策  
三道順治十四年鄉試十五年會試第一場書義三  
篇經義四篇二場論一篇表一篇判五條三場策五



道 詔如所議行又內三院會同禮部議准本年順  
天鄉試滿洲蒙古生員筆帖式同一榜漢軍生員筆  
帖式漢生員同一榜明年會試殿試俱照此始

滿漢進士分二榜

順治元年壬辰會試分滿漢爲二榜蒙古入滿洲榜  
漢軍入漢人榜滿榜中賜進士及第授職修撰編修  
及二甲出身三甲同出身俱與漢榜同是科滿榜會  
試中式五十人殿試賜進士及第三人第一甲第一  
名麻勒吉正黃旗人授修撰第二名折庫納第三名  
巴海俱鑲藍旗人授編修二甲楊宮等七人三甲賽

花等三十人各賜進士出身同出身有差選庶吉士  
賽花等九人照例立題名碑于國子監考沈椒園廷  
芳所輯館選錄姓名與題名碑不同吳爾祜題名作  
吳爾戶威洛洪作魏羅渾宋祖保作宋蘇保包達禮  
作八達里塔必圖作塔必免蓋 國語凡對音字皆  
可通用也是科漢榜一甲第一名爲無錫鄒忠倚湯  
文正公斌卽是科進士也乙未科滿榜亦取五十人  
一甲第一名爲圖爾宸正白旗人自此後滿榜仍停  
止與蒙古俱漢榜合爲一

壬辰會元除名



順治九年壬辰會元程可則字周量廣東南海人是  
科首題爲君子有大道二句次參乎吾道一以貫之  
一章三經正則庶民興磨勘以可則首藝專主用人  
不合朱註除名大總裁翰林學士胡統虞編修成亮  
議處後以薦授主事至兵部職方司郎中有詩名爲  
本朝八家之一八家者王士禎士祿施閏章宋琬陳  
廷敬沈荃可則也一日早朝士禎嘲之曰趨朝夜水  
未渠央聽鼓應官有底忙行到前門門未啟轎中端  
坐喫檳榔後出守廣西桂林府知府卒

瓜子之兆

鄒忠倚字子度無錫人幼遊錢塘禱夢于忠肅祠忠  
肅授以瓜子一握數之得五十四粒後閒居其夫人  
偶以瓜子戲作狀元二字忠倚見之而悟又思夢時  
見忠肅若倚其身者然因名忠倚順治九年會試中  
式名恰五十四壬辰果殿試一甲第一授修撰癸巳  
御試詞臣復第一人呼兩狀元見查浦輯聞

一榜三及第

順治五年戊子科順天鄉試第四名張永祺大興人  
壬辰榜眼及第第五名戴王綸滄洲人乙未榜眼及  
第第八名熊伯龍鍾陵人已丑榜眼及第一榜三及



第而皆榜眼前此未有也見池北偶談

經筵講官得賜謚

沈荃字繹堂青浦人順治壬辰探花官至禮部侍郎  
充經筵講官卒謚文恪 本朝最重易名之典官至  
尙書大學士乃得賜謚其以經筵舊勞得賜謚者惟  
掌院學士喇沙里葉方靄及荃三人而已蓋異數也

注唐詩

曹爾堪字子顧嘉善人順治壬辰進士改庶吉士授  
編修是時 世祖力崇文治數 召試諸詞官品  
題甲乙爾堪從瀛臺南院 上霽顏顧問久之嘗與

吳學士偉業等同注唐詩書成稱 旨被褒嘉中外  
驚傳其語官至侍講學士

湯文正公從祀

睢州湯潛菴順治壬辰進士官參議道康熙己未舉  
鴻博大臣交章保薦之 召試一等八名授侍講康  
熙二十二年 上諭乾清門翰林湯斌侍直 上命  
斌錄平日詩文進覽斌上所著文十篇詩十首 皇  
展閱首篇親耕籍田頌肅然改容曰此 世祖章  
皇帝時事是改爲庶吉士所作乎對曰是又擬漢以  
禁囿假貧賤舉直言極諫之士 上問此詔何爲而作



對曰此漢元帝時事 世祖御試以此命題 恩  
授檢討職又閱詩十首逐字看過至末首有年老才  
將盡憂多道轉親句 上佇思久之曰何謂憂多道  
轉親對曰臣幼遭亂離半生在憂患中常隨事體認  
于道轉覺親切詩辭朴拙不勝惶恐是日 天顏和  
霽從容顧問優禮儒臣為國家盛事云見潛菴遺稿  
記事官至江蘇巡撫卒謚文正與陸清獻公俱從祀  
本朝醇儒二人而已

理學指要

耿介字介石登封人順

長進士由庶常至少詹

與湯文正公斌講明理學為天下宗著有理學指要

忠貞畫壁詩

范忠貞公承謨鑲黃旗人大學士文程子初充侍衛  
順治辛卯 論八旗子弟均得應試是科舉人壬辰  
進士改庶吉士授宏文院編修官至浙閩總督康熙  
壬子逆藩耿精忠叛忠貞死之有畫壁詩為世傳誦  
謚忠貞

登場演齣

余恂字孺子龍游人太僕日新仲子生而穎異試輒  
冠軍善音樂嘗與優伶處順治辛卯榜前恂方登場



演蔡邕別親一韵榜發恂中第一觀者謂已為之兆也解元文出人爭購誦風氣一變壬辰進士改庶吉士授編修

自知壽數

滄州呂祖望順治壬辰進士由庶吉士官至鴻臚少卿康熙乙巳病夢帝召為東嶽之神遂引疾歸舟至張家灣忽更衣端座曰吾將去矣遂逝舟中人隱隱見鼓吹騶從甚盛云錢塘項景寰自知壽數由乙未庶吉士官至兵侍嘗言吾位必八坐壽止五十四當去矣竟如其言此二事亦異矣

嘗棗

黃陂王澤宏字吳廬以父用予明崇禎翰林殉節取昊天罔極之義由庶吉士官至禮部尚書未第時自黃岡赴京過廬山宿蓮花宮未晚而睡夢坐大殿見眾僧誦經取案上棗數枚啖之遂醒口中尚有餘味正訝間忽見眾僧掌燈列席問之是日乃此菴主淨月上人忌辰眾方祭祀宗伯大異起視棗頂微缺如少數枚者乃悟前身即此菴長老也故奉佛終身

講老子

順治甲午冬

世祖在南海子講老子問無欲以



觀其妙有欲以觀其竅涿州馮文敏銓對曰無欲乃  
未發之中也有欲即發而皆中節也見查浦輯聞銓  
字伯衡號鹿菴明萬歷癸丑進士官至文淵閣大學  
士以忤璫歸降 本朝復官中和殿大學士制度多  
所贊畫順治元年甲申九月奏定郊廟社稷樂章言  
本朝削平寇亂以有天下章名宜改用平字郊禮九  
奏宗廟六奏社稷七奏從之今仍其制十年銓母范  
壽八十有七 世祖特命畫史繪銓母像加寶璽  
以寵之予卒所著有獨漉山房詩集源濟其仲子  
也

翰林降指揮

馮文敏公次子源濟字胎仙號穀園年十九登順治  
十二年乙未進士改庶吉士授編修遷至秘書院侍  
讀學士坐事降東城兵馬指揮遷淮安山清同知丁  
憂起復授翰林院侍讀遷左庶子陞國子監祭酒

老衲托生

乙未狀元史大成字立菴鄞人初生其父夢素好老  
衲名大成入室遂名順治十二年會試中式殿試本  
擬第三 上閱卷特拔一甲第一名授編修充日講  
官講周易稱 旨邀賞賚官至禮部侍郎榜眼戴王



綸滄州人探花秦鉞無錫人父會元也

乙未兩名相

黃岡李文定公天馥字湘北 上常言機事重任必不可用喜事之人天馥侍朕三十年未嘗有過焉又長洲宋文恪公德宜字右之口訥這次不能達其詞至國家大事議論侃侃 上多用其言皆順治乙未進士由庶吉士官至大學士

詠鶴詩

秦松齡順治十二年乙未進士以庶吉士授檢討  
世祖 召試詠鶴詩有高鳴常向月善舞不迎人之

句 上大加賞贊以為有品館僚內至今傳誦

解元館選

世祖極重科名新城伊闢字翁菴舉順治甲午本省鄉試第一十二年乙未成進士引 見南海子 上顧學士曰此山東解元也遂改庶吉士後官至雲南巡撫見池北偶談

返刺

吏部最重寅誼前輩雖登九列名刺必署舊寅二字順治乙未散館安丘劉祚遠補吏科給事中尋以其族祖憲石官大學士引例迴避改吏部主事孫文定



公廷銓時已爲戶部侍郎投謁偶不書舊寅二字劉  
返其刺文定遜謝而已見居易錄

魏果敏直諫

魏象樞字環極號庸齋蔚州人其先鳳陽人明永樂  
初祖爲新城主簿遂家焉象樞生而穎異忠孝出天  
性崇正壬午舉人癸未上公車已入試矣聞祖病急  
馳歸時流賊披猖奉母居山洞中 本朝順治三年  
丙戌進士由庶吉士改刑科給事中轉工部時  
世祖初親萬幾公上言宜慎起居盡啟沃責備時宰  
人爲公危 上曰給事言是因災異言天變爲人事

所至語多侵權貴 詔廷臣集議面折諸貴人無阿  
避衆皆側目遷吏科都給事中掌大計絕賅賂日夜  
宿省中邸寓則令兵馬司護防上疏言官糾拾例當  
復雖失實不當反坐言官得罪宜治以考功不可置  
重典 上嘉允之在諫垣疏凡三十餘上尋以故相  
溧陽得罪牽連黜詹事府主簿稍遷光祿寺寺丞乞  
歸養丁母憂家居十年康熙初以大學士馮溥薦  
召授貴州道御史初見上退而喜曰 聖主在上言  
官是其時矣乃具疏言科臣余司仁欺罔不法湖南  
布政使劉顯貴侵公帑不當內陞言制祿所以養廉



今罰俸例太嚴請紀過以示罰增秩以示恩 上多  
褒納逾年陞京鄉留管御史事未幾遷左僉都御史  
歷擢順天府府尹大理寺九卿戶部左右侍郎疏請  
權估值以杜浮冒核關課以防侵漁簡藩司以清賦  
稅皆命確議以聞擢左都御史首請申明憲綱劾最  
貪知州曹廷俞 上皆俞旨嘉尙復薦舉清廉知縣  
陸隴其又舉學道公明者二人貪墨者二人吏治肅  
然甫九月遷刑部尙書上言 主上宵旰憂勤臣不  
敢顧恤嫌怨忝司風紀職多未盡敢援漢臣汲黯自  
請爲郎故事得失遺補乞辭新命而領現職 上鑒

其無欺從之仍加刑部尙書銜適地震上言地臣道  
也臣失職則地反常臣總風憲咎實在臣是日獨被  
名對近 御座前語移時或至泣下其言秘不傳  
尋復爲刑部尙書始去言路其始終以言顯如此爲  
司寇執法不撓嘗曰法自天子寬之則爲施仁刑官  
寬之則爲斲法甲子以病乞歸令原官致仕陞辭  
賜御書松寒堂額以榮其行歸張額于堂有書數百  
卷曰尙書門第秀才家風貽子孫足矣歸三年卒年  
七十一諡果敏







亦不與同年先為庶常者叙同咨如明季崇禎間劉  
公正宗薛公所蘊以推官考選入為翰林編檢等官  
即不叙戊辰同咨是其例也 本朝故禮部尚書五  
文貞公崇簡崇禎癸未成進士館選不與迨順治二  
年以翰林乏才始由候銓中行改館職以在丙戌科  
館選之前故仍叙癸未咨後然名刺亦如後輩之禮  
惟左都御史郭公琇由太常卿遷內閣學士兼禮部  
侍郎未幾遷吏部侍郎仍兼翰林學士獨不與諸翰  
林叙咨又故事翰林吏部官揖尚右謂之南禮科道  
官揖尚左謂之北禮郭曾官御史及為學士遇翰林

官只行北禮

閣臣稱郡縣名

自明至 國朝士大夫相沿稱閣臣不舉其姓但稱  
其本貫郡縣如李文勤公蔚祇曰高陽是也尚書已  
下即不然唯順治末少宰胡宛委先生兆龍方為內  
閣學士被眷遇最渥士大夫稱為山陰非故事也唐  
之中葉稱宰相但舉其長安邸所居坊里之名又與  
今異蓋一時風尚云

館金三倍

于士禎云己未己後並開諸館如 太祖 太



宗兩朝實錄 三朝寶訓政治典訓一統志平定三  
逆方畧玉牒大清會典賦役全書律例及明史之屬  
率以大學士尙書學士爲總裁庚午三月開館纂修  
三朝正史則以首揆爲監修總裁諸滿漢閣臣爲總  
裁而尙書侍郎學士皆爲副總裁王以副都御史與  
焉署中餐錢月五金館中三倍

特予諡

大臣賜諡京朝官爲閣臣尙書總憲得請侍郊副憲  
已下多無之侍郎如葉文敏方霽沈文恪荃 久在  
侍從宋端慤文運以廉介受知太子少保特

始設經筵日講官

順治十二年乙未始設經筵日講官於景運門內建  
直房令滿漢詞官直宿脩顧問

講官得侍坐

順治乙未 命擇日講官時王熙未列名奉 特  
旨擢用冬十月 上幸景山臻祿閣 名日講官五  
人進講熙講尙書堯典稱 旨 命嗣後講官不必  
立講遂侍坐講官得侍坐自王熙始

經筵日講官儀注

大清會典經筵應講經書及講官職名由本衙門題



請 欽定應講官撰擬講章繕寫滿漢文進呈候  
欽定後繕寫正本副本至期 皇上墜文華殿講官  
同衆官行禮畢入殿進講講畢候 駕還宮本衙門  
官恭進講章正本凡經筵講官順治十四年定滿漢  
各八員康熙十年定滿講官自內閣學士翰林院掌  
院學士侍讀學士侍講學士詹事府詹事少詹事及  
六部尚書侍郎都察院左都御史副都御史通政使  
司通政使大理寺卿等官內由內閣學士翰林院掌  
院學士讀講學士墜任者俱得開列漢講官自內閣  
學士翰林院掌院學士侍讀學士侍講學士詹事府

詹事少詹事國子監祭酒及六部尚書侍郎都察院  
右都御史等官內由翰林官墜任者俱得開列由本  
衙門題請以原銜充補十六年 諭滿洲小九卿內  
有由翰林官墜轉者一併開列凡日講定期自二月  
經筵後始夏至日止八月經筵後始冬至日止每日  
俟部院官員奏事畢講官進講康熙二十二年 諭  
於奏事前進講凡日講遇祭祀齋戒日期俱停進講  
康熙二十二年 諭齋戒日期照例停講如不親譯  
繕寫正本副本先期以正本進呈每日滿掌院學士  
同漢講官二員開用三員捧副本進講歲終彙寫講



章進呈康熙十七年諭停止歲終彙寫止具本奏聞  
凡日講官順治十二年定滿講官二員漢講官五員  
十四年增漢講官八員康熙十年定講官俱兼起居  
注銜滿漢講官由翰林院詹事府坊局各官開例題  
請以原銜充補滿講官以通滿漢文者開例

御試翰詹

順治十二年乙未九月御試詹翰四十八人於午門  
內表一疏一判一表題爲 上親征朝鮮大捷國王  
率其臣民歸降羣臣賀表崇德二年秘書院侍講吳  
偉業表畧云惟朝選之僻壤實箕子之舊封土田附

庸分野驅于周索詩書風俗本支起自湯孫藉商王  
有道之君爲箕子不死之國自衛滿居秦空地虎踞真  
蕃石渠誘漢亡人鴟張沮水荀彘下盧龍之甲楊僕  
浮渤海之船在元狩之三年置樂浪者四郡雖稱役  
屬尙類羈縻新室以易印而開兵慕容則分疆而爭  
長泊乎大業遂擾東陲疲敝征徒驛騷征討莫除癘  
疥翻效腹心繼以貞觀之真人佐之吳公之宿將攻城  
不拔振旅而旋卽賞仁貴之先登終慨魏徵之必諫此  
固恃險弗賓阻強未服倔強于山海之間逃遁在沃  
沮之內者也茲蓋云云念我 國家新造之日正值



疆場多故之秋糾率長戈侵牟近境幸喜雅鶻關之  
戰大破鸛鵝隊之軍若使乘勝窮追因糧築壘何難  
進驅平壤直搗王京乃猶幸彼行人賜之手詔修我  
睦隣之誼寬其事大之誠蓋孟津八百之朝不貽彭  
濮葵邱九合之會忍擯江黃庶其子孫守茲盟好孰  
意矯虔不順狙詐多虞跳梁百濟之區僭越扶餘之  
長鯨身日黑漫阻洪濤魚眼波紅輒修戰艦徒甘言  
以縻我難革面以相從用是赫然加諸叢爾躬率中  
黃之士親占太白之符鼓震十三山咸聞鞠旅營連  
八百里誰逆顏行帳下拔大食之刀鏤文龍雀軍前

策渥注之產汗血驂騮嗟哉合市之人徒享開城之  
樂鳥驚則散魚爛而亡頽峴懸車肯信位宮走免黃  
巖束馬寧容依慮逋誅毋邱儉沸流之勝方之莪如  
蘇定方澆水之功遠過之矣于焉馬韓喪膽辰國驚  
魂力盡而蓋蘇乞降勢窮則高元束手大僭薩反接  
于城上莫離支稽顙于轅門坦腹牽羊甘投鼎鑊繫  
頸先馬自請灰釘我 皇神武不殺寬大有容退舍  
而許之平解縛而舍其罪方提黃鉞遽令收軍勿剪  
朱蒙俾無廢祀頗利之城入門不驚鷄犬帶方之邑  
萬戶爭迓壺漿洗兵馬普述之津爾今歸命刻日月



九都之不予實親征龍筆狼筆咸成內府之珍屈紛折巾俱陪上都之宴慕華樓賜醮合樂來賓館解甲休兵豈僅紙呈側理修降表于同文扇獻招涼布王風于下國而已哉

翰林須用不欺之臣

徐元燦字道力順治乙未進士 廷試時為文敏捷上顧見起草輒奇之及 召對便殿例舉少年習清書者中選元燦以次前 上問以年對曰臣年五十二 上曰不欺翰林清要地當用不欺之臣遂擢庶吉士

改名

李立字望石大嵩衛人今為海陽縣順治乙未進士 奉 旨改名贊元選庶吉士授御史歷官兵部侍郎 奉 命按湖北收漢陽大猾段世昌手繫之立斃杖下當世昌入獄時謂家人曰少曾遇道士能知未來言他日所遇非桃非杏非坐非行即祿盡時也今按君姓名適符尚欲生乎見觚賸

被革生員中狀元

孫承恩初名曙字扶桑常熟人為諸生負才以選牘文體不正被論除名又以太學生領順天府甲午鄉



試薦順治十五年戊戌殿試第一甲第一名進士及第授修撰承恩秀眉聳肩目光四射臚傳時見者色動共慶得人屢被顧問己亥分校會試從幸南海子賜騎御閑名馬適大風揚沙中寒疾卒年僅四十賜白金馳驛歸葬

榜眼風癱

孫一致字惟一淮安鹽城人順治戊戌第一甲第二名進士及第授編修累官至侍讀學士丁憂歸里一致未遇時甚窘乏有同鄉先達某周旋甚厚一致在翰苑某官部曹時給其費未幾某望雲南監司值吳

逆叛遂陷賊爲其所汙逮吳逆殄滅某白度必罹刑憲遂逃歸聞一致丁憂遂潛投之求指生路且爲航海之計一致佯好言留之潛命其子出首某遂正法而一致予以捕逆黨受賞註官居無何一致忽見某登旗竿頂大罵曰汝生平受我恩惠不少我急而投汝縱我罪當死汝忍令子首我獲賞耶如是晝夜不去一致畏惡之遂鋸其竿鬼卽入室詬罵逾厲且曰汝陽壽未盡取汝不遠且令汝受苦乃以兩手擠其腰脊一致卽大痛不能坐起卧病床席若風癱然癸酉康熙三十二年乃卒



丁酉江南科場作弊覆試

順治十四年丁酉科江南鄉試科場多有物議榜發之日諸生哭于文廟騰有歌謠是科題為子曰貧而無誥一章有無名子作黃鶯兒詞嘲之曰命意在題中輕貧儒重富翁詩云子曰全無用切磋欠工往來竅通其斯之謂方能中告諸公方人子貢原是貨殖家風見堅瓠集上命進覽震怒逮兩主考十八房考窮治其獄其無名子匿不出西堂集乃以兩大主考赴西市房考十八人皆議絞蓋江南科場往往有紛紛之議比他省為甚得此一番洗刷為之肅清樵房考餘

不能知其三人有異兆焉少司空李呈祥言已門生河南人涂秦令入簾得一卷氣雖清力尚欠厚置之別几方轉瞬復在正取卷內如是者三心異之意其家必有隱德欲呈薦既而曰晚祈一夢何如果夢正襟危坐忽從仰塵墜一小僧貌最秀狀甚憂慘屢詢不應忽又墜一繩圈于僧頂其僧惶急兩手解不脫已亦代為之解愈解愈緊驚迫而醒次日薦之得雋本生來謁語之言門生乳名和尚年僅弱冠但以繩繫頸解之未脫恐非佳兆也後成進士除江南令又山陽令李祥光山西翼成人最純謹自守初蒞任日



吏役上謁俱見坐一帶索官又懷寧令周霖陽曲人  
赴任起程日門前兩槐忽怪風吹折痕如刀截是科  
三人共入內簾後俱纒首幾亦微矣原李舉人除伏  
誅外 上親覆試江南丁酉諸舉人覆出吳縣潘隱  
如吳江縣吳兆騫錢威吳蘭友莊允修等皆革去舉  
人遣戍口外楊廷璋顧元齡等皆革去舉人惟原中  
第二名陸燦本姓錢列覆皆前列 上獨拔吳鳴珂  
第一戊戌會試不第 欽賜舉人與會試已中張貞  
生等一同殿試二甲第八名改庶吉士授編修蘇州府志  
是科直隸順天亦以科場作弊誅戮一二分房之官

南北舉子皆臨軒覆試覆出吳賜等遣戍尙陽堡順  
天先覆試得與會試江南覆試遲不及與會試矣亦見

尤侗以樂府受知

順治丁酉江南場弊發有編爲萬金記者制府以聞  
詔命進覽震怒臬司盧乃大索江南諸伶雜治之適  
山陰御史姜圖南北上過吳門徵尤侗新劇同人宴  
之申氏堂中觀者如堵邏者雜其中疑其事類馳白  
臬司卽檄捕諸伶拷掠誣服既得主名將加羅織且  
徵賄焉會 諂許因公註誤者自陳開服尤侗適遭



臬司事遂北上事得寢而盧旋以貪墨寘極典人皆稱快先是侗作臨去秋波一轉制義刻雜組中時學士王熙侍講筵上偶語及老僧四壁皆畫西廂却在臨去秋波悟禪熙隨以侗制義對上立索鈔呈復索刻本上親加批點稱才子者再因問侗出身履歷歎息久之命取全帙披閱他日又摘討蚤檄示學士曰此奇文也問有副本否對曰無遂遣官遍覓坊間不得適侗在京至邸携一冊去進呈上大  
喜名學士示之且指學士父崇簡序以前未見爲言亡何有以侗離騷樂府獻者上益讀而善之令

教坊播之管絃爲宮中雅樂聞者艷之有勅以前事登聞不但雪冤當希不次之擢侗不肯出京十七年上幸南海子徐公肅元文上忽駐馬問曰尤侗爾師乎對曰然西堂雜組有爾序乎對曰然上曰朕知之久矣因稱獎集中文又問以何事降調何爲至今不出也公肅致書侗再來京侗不肯有陳老人道恣者號宏覺國師一日賜坐上嘆塲屋中士子有學寡而成名才高而淹抑者如狀元徐元文業師尤侗極善作文僅以鄉貢選推官復緣事降調豈非時命大謬之故耶師曰恣聞之君相能造命士之有才



患 上不知耳上既知矣何難擢之 上首肯曰朕亦有此念因命侍臣檢文集中臨去秋波時藝共讀之 上忽掩卷曰請老和尙一轉語曾不是山僧境界時昇首座在側 上曰天岸何如昇曰不風流處也風流 上大笑見侗北遊錄後侗于康熙己未名試博學鴻詞官檢討人以爲美談

庶吉士兼滿漢二書

吳國對字玉隨又字默巖全椒人初母有身憂二龍相對已而同乳生二男子國對先生故名對其季曰龍幼嗜學工詩賦善書法順治戊戌成進士當丁酉

科時世廟特用誅流以懲南北鄉試之弊其明年禮闈校士 上親定題目夜半遣親臣齎送鎖院其防密如此既策之於廷 上曰吾旣以法懲除積弊宜可得天下真才故於是歲所取士恩義猶有加焉連數日引見宮門拔庶吉士者三十二人與承恩等三人讀書翰林中 上嘗幸景山瀛臺南苑輒召以從賜坐延問如家人有欷歔感泣者嘗問對對侃侃而陳 上重焉舊制初教習分 國書漢書人習一書至是 上謂此皆真才漢書其所嘗習命人兼二書每間一月御試之殿中親第其高下由是翰林之選



益重焉

學士直諫

張貞生字幹臣號箕山廬陵人祖黻明成化時官都督府經歷嘗以救林見素得罪與陳白沙交善以理學直諫著名貞生少穎入塾投書即有志聖賢之學順治十五年戊戌科第一人殿試二甲改庶吉士授編修歷國子監司業陞侍講學士辛亥 駕將出關謁 陵時有差滿洲大臣巡方之議貞生於乾清門面奏直諫言過懇切觸 上怒下考功議革職爲民上愛其才止鑄二級去即于九月二十二日買舟南

歸同時如宋琬高珩王士禛皆賦詩餞其行士禛以詩留別諸君曰秋風送客復乘船江遠帆孤一夢懸焚草燈前期報國披肝殿上願回天聖明豈是誠難格臣慙還慙術未全賴有宗工交勸勉臨岐申贈繞朝鞭遂歸家居二年 詔以原官起用辭不至再召至京卒于位貞生初爲司業時頗聞陽明良知之說其後乃一宗考亭嘗書至危是人禽之戒喫緊在義利之關二語于座右以自警

石榴詩

陳廷敬字子端一字說巖澤州人少警慧九歲賦牡



丹有要使物皆春句人咸異焉舉丁酉鄉試順治戊戌進士初名敬殿試榜有通州同姓名者世祖特命加廷字以別之而俱改為庶吉士辛丑初設內秘書院授檢討告歸擢國子監司業庚戌遷宏文院侍讀辛亥復設翰林改侍講轉侍讀擢學士廷敬雅嗜讀書嘗薦戶部郎中王士禎詩學戊午正月遣侍衛傳命偕士禎胥以詩進上覽廷敬石榴子詩曰風霜歷後含苞實只有丹心老不迷誦之至再玉音琅然廷敬又力薦士禎詩翌日改擢士禎為翰林院侍讀閏三月命偕士禎日直南書房廷敬每自宏德

殿講訖入南書房直廬以為常

名舉博學鴻

儒復疏薦戶部王事汪琬琬亦尋入翰林癸未四月命陞文淵閣大學士兼吏部尚書仍兼經筵故事大臣入閣不復侍經筵兼之者桐城澤州二相也卒上遣皇子臨奠賜紫杉闕器一具賻銀一千兩御製輓詩予祭葬賜謚文正所著有尊聞堂集八十卷歸去集二卷晚手定為十卷曰午亭文編

郎中改侍講

王士禎字貽上號阮亭新城人布政象晉孫與勅第三子生有異稟七歲讀詩至燕燕綠衣等篇便悟其



古八歲能詩兄士祿授以裴士之法十一歲祖醉後  
看從翁象咸作草書示諸孫屬對曰醉愛羲之蹟士  
禎應聲曰問吟白也詩祖奇之曰此子當以文章名  
世年十五有詩成卷名落箋堂初藁士祿序而刻之  
有落葉句云已共寒江湖上下况逢新燕影參差又  
云年年搖落吳江思忍向烟波問板橋庚寅應童子試  
皆第一辛卯應鄉試舉第六名乙未會試五十二名  
戊戌殿試第二甲三十六名得揚州推官庚子充江  
南同考得盛符升九人辛丑謁直指于松許聞鄧  
尉梅花盛開輕舟登眺見山南太湖濱漁洋山烟鬟

奇特始自號漁洋山人甲辰內遷禮部主客司主事  
提督兩館遷儀制司員外郎丙辰補戶部四川司郎  
中戊午正月 召對懋勤殿明日奉 旨王士禎詩  
文兼優著以翰林用改侍講未任轉侍讀夏同學士  
陳廷敬侍讀學士葉方霽直南書房先是十五年士  
禎赴補至京一日 上忽問今各衙門官讀書博學  
善詩文者孰為最首相高陽李蔚對曰以臣所知戶  
部郎王士禎其人也 上曰朕亦知之一日又問桐  
城張讀學對如前 上問其詩可傳否對曰一時之  
論以為可傳臣等亦皆就正之乃有是命



萬言疏

熊賜履字敬修一字素九順治十五年戊戌進士改庶吉士授編修歷遷侍郎康熙七 years 上萬言疏曰臣荆楚鄙儒謏劣無似猥蒙先帝簡拔授以清班繼荷皇上殊恩累遷今職十載禁林兩朝知遇聖恩高厚踵頂莫捐中夜捫衷汗流浹背伏念臣雖至愚自幼讀書辨志竊以聖賢爲師數年以來恭遇皇上高拱深居經筵未舉區區獻納之微忱無由上達于黼座且以出位陳詞典制有禁因循噤默尸素到今臣之罪也亦臣之分也茲者天遇皇上恪謹

天戒軫念民依虛已下詢採及葑菲正微賤小臣圖報涓埃之日也臣備員侍從職司勸講不敢撫拾浮談毛舉細故以涸宸聽謹仰遵明詔殫竭愚衷芻蕘之言庶幾高深之一助也惟皇上留神省覽則天下幸甚伏讀詔書有曰今聞直隸各省人民多有失所疾苦窮困深可軫念或因官吏貪酷朘削民生或因法制未便致民失業嗚呼皇上此心乃二帝三皇之心皇上此言乃二帝三皇之言也夫民生至今日其困苦亦孔亟矣國家日言生聚而凋敝愈甚日言軫恤而瘡痍不起日言招集言蠲免而



流亡滿目逋欠浸多近而畿甸遠而直省流離瑣尾  
之狀所在皆然未忍備述遡厥由來惟是官吏之賍  
剝徭賦之科征有以致之誠有如 聖諭之所云者  
蓋小民水耕火耨終歲勤勞僅足以贍給其俯仰而  
夏稅秋糧朝催暮督賣絲雜穀十室九空私派倍于  
官征雜項浮于正額況乎分外之誅求無名之賠補  
種種剝刻剝膚及髓一有不應而老弱疾病俱已顛  
頓呼號于捶撻敲扑之下而無復能安其室家并盧  
之樂閭閻之膏液有盡而猾吏之貪囊無底愚蒙之  
皮骨僅存而有司之欲壑無厭哀此小民百孔千瘡

無從療治正使年熟歲稔尙難保須臾不絕之命  
且水旱頻仍饑饉見告其不至轉徙流亡填溝渠而  
委道路者幾何哉蠲征則吏收其實而民受其名賑  
濟則官增其肥而民重其瘠強者斬木揭竿弱者析  
骸易子此理勢之所必有者嗚呼此固民情之大可  
憫而國計之重可憂者也雖然此亦不獨守令之過  
也守令固吏之親乎民者也然上之有監司又上之  
有督撫 朝廷方責之以廉而上官實教之以貪  
皇上固授以養民之職而上官日課以厲民之行今  
日之守令誠有難焉者雖然督撫爲要已督撫廉則



監司廉守令亦不得不廉督撫貪則監司貪守令亦不敢不貪表直影端源清流濁此又理勢之所必然者也今之爲督撫者求所謂精白一心爲國家安輯地方愛養黎庶者臣亦不敢謂遂無其人獨是國家以全省命脈舉而付託于其身界以察吏安民之權屬以興利除害之任其待之不爲不隆而任之不爲不重矣乃日望其察吏而吏治日壞日望其安民而民生日蹙日望其興利除害而一利未之興一害未除也不可不謂之上負朝廷下負生靈矣大抵有司之職業在地方上官之激勸憑舉効年來督撫之所薦稱循卓

者果小民之戴爲父母而尊若神君者乎其所以効爲貪庸者果百姓之畏若豹虎而疾如蛇蝎者乎是未可知也以督責爲能而不問其慈惠以催科爲政而不問其撫綏以夤緣之巧拙爲優劣而不問其才幹之短長以禮節之厚薄爲殿最而不論其品誼之高下此風一倡爭相效尤交蟠互結牢不可破如是而異其激濁揚清興利祛弊也是何異適越而北其轅炊沙而望其成飯耶所以比年以來旱澇時聞死亡載道而此輩輿金饌玉暮宴朝歌恬焉不知有困窮疾苦之足念若秦人視越人之肥瘠漠然不加喜



戚於其心在此輩不過苟一時之利梯一己之榮而不知其歛怨聚愁爲國家祟此不可解之蘊毒在廷諸臣大率習爲瞻徇務相容隱不肯舉發其貪汚之蹟以告 皇上間有一二指名糾劾者亦不過淡寫輕描微示其意曾未嘗直暴其汚穢殘酷之所在而皇上亦遂莫得洞悉其蠹國殃民之實狀故此輩得以久竊威權貪戀祿位方恃此以爲壟斷之長計而無辜赤子之顛連而無告者正未知何日而有再蘇之望也然則今日之吏治民生儻久壞極其所從來亦不問可知矣伏乞 皇上將現任督撫大加甄

別其賢而能者加銜久任其貪汚不肖者立賜罷斥無令久居人上荼毒生民嗣後遇督撫缺出不拘內外大小臣工果有端方清正能事才優如古大臣其人者 勅部院大臣從公保舉授以茲任其考課也以民生之苦樂爲守令之賢否以守令之貪廉爲督撫之優劣則督撫得其人監司自得其人監司得其人守令亦必得其人自然廉者勸貪者懲有利必興有害必除而民之不獲其所者寡矣不此之計而日弊弊焉言計吏言安民言舉劾言蠲賑終不過虛文故套羨人聽聞而毫無補于吏治民生之實事也何



則任之非其人行之失其意雖周官周禮祇足爲厲民禍世之具而已傳曰有治人無治法又曰人存政舉皆不易之論也此 聖諭之所已及而臣詳切言之者也雖然內臣者外臣之表也京師者四方之倡也本原之地亦在朝廷而已朝廷一舉一動萬方之則倣九土之觀瞻于是乎出而其大者則在于立網陳紀用人行政之間此其鼓舞化導之權轉移感動之機固有不問之草野而問之廊廟者此固一定之理也今朝廷之可議者不止一端臣請擇其至重且大者言之一日政事極其紛更而國體因之日傷也

從來聖君賢相開國承家必取一代之典章法制爲之斟酌損益釐爲百世不易之令模以善建于不拔遠之子孫率由無愆忘變亂之患近之臣民遵守無紛擾叢脞之虞三代聖王所以保世滋大無疆惟休者此也我 國家章程法度一踵先朝之舊雖其勢之極重而難返事之極敝而難行者類無不承訛襲陋苟且因仍曾不聞畧加整頓去其所爲太甚之弊而急公喜事之輩又從而意爲更變於其間但知趨目前尺寸之利以便其私而就中莫大之憂無窮之慮潛倚暗伏於冥冥之內而皆不知所以爲之計朝



舉文罷旋罷而旋舉甲張之弛條弛而倏張不獨盈庭聚訟空耗寮案之精神抑且令甲游移重傷國家之大體王言屢褻朝政滋繁議論日多成功絕少此時之最當講究者也伏乞皇上勅下議政王貝勒大臣九卿科道將國家制度文爲詳慎會議何者當沿何者當革何者宜益何者宜損參以古制酌以時宜務期振裘挈領網舉目張勒爲會典著爲成憲則上之道揆下有法守貽謀垂裕作述於昭而億萬年無疆之基業在此矣奏上 上深嘉之飭部議行復官至太學士

### 陞官預兆

屠粹忠字純甫鄞縣人順治戊戌進士粹忠垂髫時讀書閭里董氏壁間大書成名戊戌四字及成進士歸題跡尙存里中傳爲異事擢兵部尙書先是聖祖以粹忠老年矍鑠書修齡堂扁額賜之旣又賜臨趙孟頫行書曰白鹿城頭百萬兵碧油幢下一書生如今始識爲儒貴卧聽元戎報五更乃知爲大司馬之預兆也

### 會元爲家人後身

順治十六年己亥再行會試會元朱錦上海人出庶



吉士授編修先是上海有朱錦初投潘尙書爲家人後其子遊泮入謝于潘潘曰汝子已係朝廷士子可以門生禮見勿復作主僕觀也卽檢其靠身文券還之朱感泣曰荷洪恩必當矢報潘曰我富貴已極何賴于汝朱懇請不已潘徐思乃曰現今文廟圯壞汝能修葺賢於報我遠矣朱卽獨力營繕頗稱華煥此事已過百餘年人無有憶及者順治己亥科會元朱錦亦上海人官翰林至康熙壬子歿臨卒時文廟正梁年久朽壞亦以是刻崩視其建造之姓名卽朱錦也始知會元乃其後身初順治己亥秋八月再行會

試趙吉士與朱若臣士綬同公車若臣夢看榜榜首姓朱單名是金字偏旁右邊不甚了了趙笑曰得無爲他人作夢耶若臣具呈禮部改名鎔榜發會元朱錦按吉士卽著寄園寄所寄者

佳狀元

徐元文字公肅榜姓陸崑山人順治己亥一甲第一名賜進士及第世祖召見乾清門諭以特簡之意還啟皇太后曰今歲得一佳狀元元文率諸進士謝恩世祖爲御殿百官陪列鴻臚讀表前此未有也除翰林院修撰嘗從幸南苑賜乘御



馬命學士折庫納爲執鞚元文館師也遜謝不敢乃  
改命侍衛又嘗晚對便殿夜分賜饌 世祖又問  
從者得毋饑乎復命侍衛賜之食嘗被命進爭齋說  
一篇 世祖讀書所也覽而稱善爲刻行之官至  
大學士

啞子開言

徐元文赴試金陵船家一啞子忽迎曰狀元來矣後  
果然造一船與之俾温飽終身崑山徐氏兄弟三人  
長乾學康熙庚戌探花次秉義癸丑探花三卽元文  
同胞三及第前明三百年所未有也是科榜眼華亦

祥無錫人探花葉方霽長洲人三鼎甲皆在江南

中庸註避諱

葉方霽字子吉重華子順治十五年 世祖親覆  
試江南丁酉貢士以古文詩賦方霽試瀛臺賦甚工  
上深喜之次年秋己亥復行會試中式殿試一甲第  
三歷官學士常撰八箴以進又奉 命撰太極圖說  
上善之 賜貂裘進掌翰林院學士充明史總裁  
己未 詔天下保舉博學鴻詞 命校閱試卷稱得人  
時修四書滿漢講義至羔裘元冠不以弔方霽爲  
聖諱商于同僚俱不能對翰林典簿穆維乾對曰大



字當仍原字以尊經小註改元字以避諱方霽問何  
所本維乾曰中庸慎獨乃原字小註改謹字方霽大  
悟曰余自幼疑此始知朱子為避諱也深加敬禮人  
服其虛中維乾字介公號圭炎山海衛人方霽官至  
刑部右侍郎卒贈禮部尚書謚文敏

備書會元

陳常夏字鐵山龍溪人家貧力學嘗為人傭書順治  
十六年辛丑會試第一人殿試三甲第一百三十七  
名進士授米脂縣令

狀元騎驢

順治辛丑狀元馬世俊字甸臣溧陽人授修撰性朴  
素釋褐貧不能具軒騎策蹇驢老蒼攜宮袍隨之傳  
為士林佳話

榜眼二字之半為根

李仙根字子靜號南津遂寧人父實字如石崇禎  
癸未進士為長洲知縣國變棄官不能歸蜀僦居錦  
帆著有蜀語吳語四卷後以子貴不易其操方巾布  
袍終其身仙根侍父來吳遂占籍長洲順治十八年  
辛丑榜眼授編修初仙根居吳館于鄉間柴氏子名  
世俊者夢入京試得狀頭師得榜眼以告仙根喜言



負因排榜眼二字之半合爲根字改名仙根仍回原籍應試中甲午鄉試是科果得榜眼而狀元則馬世俊也由侍讀册封安南晉閣學陞戶部侍郎著有文南紀便畧是科探花吳元字廸前歸安人授編修

熟習國初典故


張玉書字素存丹徒人順治辛丑進士選庶吉士官至大學士謚文貞有松蔭堂集儲大文序大抵皆春容典雅瀟灑乎 盛世之音其拖諾仙狼居胥山二碑叙述 聖武神功尤爲詳贍足以昭示萬世其紀平定江南事紀滅闖獻一賊事紀三路進師下雲南

事紀平水西事及國紀皆端緒詳明得諸耳聞目見足以彰開國之鴻烈紀順治間樂章及錢糧戶口三篇皆資掌故而紀陝西殉難官事一篇亦足與史傳相恭他若遊玉泉山記遊化育溝苑後苑記遊喀喇河屯後苑記遊熱河後苑記皆足發揚太平愷樂之象其餘碑誌亦多 國初將相事迹可備考

稱玉堂之始

今稱翰林爲玉堂始于朱翰林學士院玉堂二字宋太宗嘗書以賜蘇易簡高宗亦書以賜周麟之





淡墨錄卷三

蜀綿 李調元 兩村

敬天

康熙初孫岷瞻在豐為侍講學士時嘗言 聖祖  
 勤學前古所無坐處環列皆書籍尤好性理五經四  
 書於所坐室中顏曰敬天左曰以愛己之心愛人右  
 曰以責人之心責己皆 御筆自書書法亦髣髴歐  
 顏見章奏有德邁二帝功過三王等語謂二帝三王  
 豈朕所能過戒羣臣以後不許如此陸清獻公樂聞  
 其言因謹述之見陸先生年譜



楊給事泰經題再錯

康熙二年癸卯順天鄉試以經題訛錯吏部給事中楊鼎上疏曰竊惟三載一試本求賢盛典故事凡闈中試題例皆本經同考官所擬今春秋經題則同考官羅繼謨擬進者也乃春秋第四題經係邾了而題訛邾人夫以春秋本經闕春秋房而題有訛錯其人固已疎矣且此第四題卽己亥科會試之第二題也己亥是題亦曾以邾子訛邾人隨經知貢舉與監試諸官題叅而考試官亦自檢舉請 旨改正試錄因將同考官范廷魁孫承恩處分在案此人人共知者

己亥至今相隔祇一科不宜遺忘而繼謨者又己亥春秋房中式士也以己中式題而擬以試士旣屬可怪况已經訛錯之題而重爲訛錯在前此之誤猶曰坊本相沿偶失檢點故孫范叅罰可從輕擬今已經更正 敕改試錄煌煌然見勒功令而乃以是科中式之人題卽是題錯復再錯是前爲過誤今且怙終前固違經今復悖敕此其所係匪細故也然且前時舉人哄堂而爭則內簾受過凡及題紙寫邾子者概使錄入今之諸生亦哄堂而爭而內簾必不受過凡及題紙寫邾子者皆貼斥不錄遵經士子反受黜落



去取盡乖詘抑誰贖毋怪乎叩闕之多曉曉矣上  
閱疏奉 旨從重處分鼎字清詞仁和人順治十二  
年進士

策論會元

康熙三年以八比勦襲鄉會試改用策論甲辰會試  
海寧沈珩昭子以二場擬 太祖 太宗 上  
尊號表最工中會元殿試二甲授中書已未 名試  
鴻博復取二等第三名授編修著有耿巖文選珩一  
云秀水人

崧山僧

嚴我斯字存菴歸安人康熙甲辰狀元授修撰歷官  
禮部侍郎嘗夢至一山僧舍中見座師及房師諸同  
年俱僧服我斯訝之諸公曰寧忘却此地耶因問山  
何名僧云崧山我斯忽悟曾晒鞋于堦視之尙未燥  
遂寤數日卒口占偈云誤落人間七十年今朝重返  
舊林泉崧花道侶來相訪笑指黃花白鶴前見曠園  
雜志是科榜眼河南柘城李元振字正孟官至副都  
御史壽八十三探花無錫秦宏

翰林建言

衛旣齊字爾錫山西猗氏人康熙甲辰庶吉士檢討



庚戌 詔求直言忤 旨謫霸州判翰林建言既齊  
其一也後稍遷至順天府尹辛未御史陸清獻以諫  
停止捐納保舉謫奉天安插既齊復面奏民情惟恐  
陸御史遠謫遂得寬釋其實衛與陸初不相識後仍  
莫往莫來人兩賢之

館選僅十二人

康熙丁未會元黃初緒崇明人亦以策論登第特館  
選僅十二人會元不與桐城張文端公英實 本朝  
一人

術士不驗

居易錄吳人張姓以術游公卿間常許繆念齋形狀  
元康熙六年丁未果第一吳中驚以為神門外車騎  
填委張亦自高聲價累致千金韓莢時教授陋巷託  
友代問張厲聲曰此人來歲當死還問功名乎及莢  
會狀張遁去

長沙痛哭書

丹徒張九裁字禮存輿徵子玉書兄也九歲通五經  
壬午未冠登薦丁未對策直刺部院督撫陋弊司農  
正矩讀而歎之持其卷語諸大僚曰此長沙痛哭書  
也既奏擢一甲第二名授編修



立生祠

平原董訥字茲重康熙丁未探花由編修歷江南總督以閱河事鑄級名爲侍讀學士民爲立生祠次年上南巡民數千執香祠前求仍放訥爲江南官迎鑾訥迎駕上遣招訥至舟前曰汝做官好江南人爲汝蓋一小廟矣因大笑旋有總督漕運之命

會元夢

宮夢仁字宗袞直隸靜海人初名宏宗久困場屋一夕夢鄉前輩林會元春書一册予之春字子仁于是更名夢仁康熙九年庚戌果中會元

三十金

德清蔡石公啟傳侍郎奕琛長子順治甲午舉于鄉時夫人尙未舉子私蓄三十金爲置一妾妾至垂泣不止啟傳怪問之曰吾夫以負營債故至此啟傳乃夜往夫家語之曰我爲爾消釋此事然我不可歸歸則心跡不明卽襍被卧夫家名營卒至謂曰汝輩違法今不汝較卽繳券付金卒亦感動如言天明啟傳命轎昇婦還夫卽以三十金爲贖然後歸夫人踰年卽舉子見曠園雜志是科啟傳上京應會試時有妓欲狎之啟傳賦羅江怨詞云功名念風月情兩般事



日營營幾番攪擾心難定欲待要倚翠猥紅捨不得  
黃卷青燈玉堂金馬人欽敬欲待要附鳳攀龍捨不  
得玉貌花容芙蓉帳裏恩情重怎能兩事兼成遂功  
名又遂恩情三杯御酒嫦娥共竟去康熙九年遂中  
狀元

查明詩

啟傳赴公車時投刺山陽令蓋同年而先仕者令批  
其刺令闈者查明遂拂衣去至是及第令以厚幣請  
罪啟傳却之答以詩云一肩行李上長安此日應憐  
范叔寒寄語山陽賢令尹查明好向榜頭看

四一字

池北偶談先是德清有蔡翁者築室成夢人持一盤  
內有紅箋四每箋書一一字共四一字後其孫奕琛  
福王時相官一品子啟傳庚戌一甲第一啟賢子升  
元壬戌一甲第一兩狀元俱生此室後從弟彬辛酉  
浙省鄉試第一始悟四一字之兆

講性相近

德清孫在豐字岷瞻懋果孫康熙庚戌榜眼由編修  
歷陞侍講學士日講起居注一日上命講性相近  
也對曰性本聖一一樣但此論義理之性若氣質之



性便不能一樣 上曰義理氣質有兩個性乎對曰  
義理卽在氣質之中二者一也 上曰這說得好官  
至工侍

此文有關國體

崑山徐健菴乾學康熙庚戌探花爲禮侍時朝鮮使  
者鄭載嵩訴其國王受枉語頗悖妄乾學劾其不敬  
上見之喜曰此文有關國體陞左都御史已而王上  
疏請罪復劾罷江西河南兩巡撫陞刑部尙書以被  
誣辭歸先是乾學領各館總裁 上命攜書局卽家  
編輯明一統志

安溪夢兆

安溪李文貞公光地未貴時祈夢于九龍灘廟神贈  
詩一聯云富貴無心想功名摠不成意頗惡之後康  
熙九年庚戌科中進士官至相國方知戊字似成而  
非成字想字去心恰成相字見袁枚子不語但誤作  
戊戌

學問得力

李文貞以耆碩特備顧問 御製朱子全書周易折  
衷及性理精義律呂韻學等書皆承 旨纂修文貞  
公嘗言晚年學問始進得力于 聖訓居多



庚戌名臣最多

康熙庚戌一科名臣最多大學士如安溪李文貞光地遂寧張文端鵬翮尚書如武進申恭毅申喬都御史湖廣總督卽墨郭華野琇御史平湖陸清獻隴其皆名臣也

陸清獻從祀

陸隴其字稼書平湖人生而穎異靜默父初授芟節左傳少之乃暗誦全文少長勵志聖賢之學專意洛閩諸書嘗點勘四書大全參以蒙引存疑而一折衷于朱子康熙丙午舉人庚戌進士乙卯授嘉定縣知

縣巡撫慕天顏頗愛重畧嫌儒術迂緩以非應變才奏鐫級調用未及下又以盜案落職盜案者邑民張與汪有小隙訐訟汪赴理夜遇盜擊傷歸謂其弟曰張遣殺我遂死清獻以小隙無殺理且張亦不似殺人者遂釋張而別遣捕役緝之得真盜七人讞上部議以跡近諱盜革職邑大駭里民扶老攜幼填街爲令呼冤悉架枿結綵然燭以送並刻木立生祠人士競爲詩美之彙爲公歸集梓行適 召舉博學鴻詞膺薦未及試以憂歸刑部尚書魏象樞爲山西總督首抗疏辯其冤再疏舉廉吏十人清獻其一也奉



吉後原官癸亥補靈壽縣知縣甲子夏兩江總制于公薨 上臨朝痛悼問九卿詹事科道今天下清廉如于成龍者有幾人於是九卿等以直隸巡撫格爾古德部郎范承勳蘇赫江南學道趙崙揚州知府崔華杭州知府張鵬翮靈壽知縣陸隴其對時雖未卽擢用然七人者後多至大位有聲名巡撫格薦隴其清操飲冰愛民如子題請擢用夏科道員缺 上面諭部院官各舉所知于是工部尙書張英左都御史陳廷敬兵部右侍郎李光地交口論薦奉 旨行取臨行邑民哭送數萬如去嘉定時是年秋補四川道

試監察御史辛未夏 上以久旱 諭諸臣協同會議直陳利弊先生遵上三議其一疏曰直隸被災帶徵錢糧當急豁免一言直隸編審人丁宜求均平一言捐納保舉之法斷宜停止皆切中時弊既又上疏曰夫捐納一事原非 皇上所欲行不過因一時軍需孔亟不得已而暫開復恐其賢愚錯雜有害百姓故立保舉之法以防之慮深遠矣近復大同宣府運送草葺並保舉而亦許捐焉則與正途無復分別且保舉所重莫重于清廉或督撫保舉必有清廉字樣方爲合例若保舉可以捐納則是清廉二字可蠲納



而得也此亦不待辨而知其不可矣若夫捐納先用  
之人大抵皆奔競躁進之人故多一先用之人即多  
一害民之人此又不待辨而知其不可矣臣更有請  
者臣竊見近日督撫于捐納之員有遲之數年既不  
保舉又不叅劾者不知此等官員果清廉乎抑或在  
清濁之間未可驟舉驟劾乎夫既以捐納出身又不  
能發憤自勵則其志趣卑陋甘于汙下可知使之久  
踞民上其荼毒小民不知當何如故竊以爲不但保  
舉之捐納急當停止而保舉之限期更當酌定伏乞  
勅部查一切捐納之員到任三年而無保舉者即

行開缺聽其休致庶吏治可清選徒可疏而民生可  
安矣奉 旨同九卿會議清獻力爭曰捐納一途實  
係賢愚錯雜恃保舉一綫可防其弊今若并此一綫  
而去之得與正途一體陞轉 國體之謂何恐未可  
云無礙也雖有次年三月停止之期然待次年三月  
停止則此輩無有不捐納者矣澄叙官方之大典豈  
不蕩然掃地乎此臣請速停保舉之捐似難無庸議  
者也至于設立保舉而不定期則不肖之員多因  
循一日百姓多受累一日即云設立限期反生營求  
之弊此在督撫不賢則誠有此若督撫賢明何處營



求臣不敢謂天下必無一賢明督撫也。即使督撫不賢，亦必不能盡捐納之人，而保舉之。此臣請定保舉限期一議，似亦難無庸議者也。時大兵草草需運甚急，計臣方恃捐納一項以濟國用，當軸者亦頗以為便。票本各持一見，議與先生既相水火，而富室儲資，日夜俟開例，希進者相率彈冠不啻，飢渴即諸臣以捐納進者，內外都有先生于疏議中痛詆斥之，由是都中大譁。部議以先生拘執資格致捐納之人猶豫觀望，遲誤軍需，飾虛詞紊政事，負言官之職，擬革職。謫奉天安，揆上心知其無他，特原宥之，俾仍舊職。

兼命巡視北城。是年冬試，俸滿憲臣以前事甄別對品，改調歸。既歸，屏居泖口讀書。課子卒年六十一。清獻之學，繩尺考亭，以居敬窮理為要，謂窮理而不居敬，則玩物喪志而失于支離；居敬而不窮理，則將掃見聞空善惡，其不墮于佛老，以至于師心自用而為猖狂恣睢者鮮矣。自明姚江倡良知之說，鼓動一時邪說，詖行人心大壞，而國運墮之清獻以為必尊朱子而黜陽明，是非明學術可正。嘗著學術辨三篇，與河南湯宗伯、山西范進士彪兩書往復辨論，有曰：白沙陽明之病，今世學者亦知之。至于涇陽景逸、固宗



程朱固斥陳王而謂其偏于主靜近于禪學是非深  
入間奧辨析秋毫不能爲此極論也著有三魚堂集  
及評選國策去毒五十篇手定先正一隅集已刊行  
其篋中所遺有問學錄一篇日鈔二十卷尚有語錄  
雍正年用禮臣議從祀  
乾隆元年贈禮部侍郎  
謚清獻

熙朝元老

太倉王掞康熙庚戌與原祈同榜進士泥金疊至吳  
梅村在座謂其父太常公曰彼蒼者天當是君家門  
下清客太常駭問云何梅村曰善探主人意而巧于

趨承事事如意者門客也今日之天毋乃近是太常  
不覺莞爾見觚賸掞累官尙書至大學士未入閣前  
大病幾危或有薦中州李先生善拜斗者重聘迓之  
至則獨閉一室初不聞聲飲食從竇中出入或潛窺  
之見以白楮粘壁北面禮拜時又向壁審視復拜如  
初如是七日啟戶曰尙書無恙昨斗府已送扁署云  
熙朝元老康熙某年月日爲王掞立不十日病瘳次  
年如期宣麻雍正改元遂罷相始悟熙朝二字見袖  
堂筆談原祁奉常公孫以畫供奉 內廷由知縣陞  
御史改翰林官至戶侍



韓茨制義

制科之文至韓茨而翕然一變浮滑之習康熙十二年癸丑會殿俱第一會試撤闈上宣取茨硃墨卷覽之稱主司得人即投編修是年冬十一月召茨至起居館作太極圖說傳論寫詩文二首進呈明日命悉呈平日窓藁遂以刻本五十篇進上召至宏德殿命講大學畢上問平日所作必尚多時館師學士熊賜履代奏曰尙有三十三篇以題目小不敢呈上曰不妨都進來其三篇即鄉試墨卷也上閱悉留覽其時文受上知如此官至禮部尙書謚文

懿

幽冥館師

韓文懿爲諸生時有吏持贄儀突至欲延作師而無名刺約期以乘輿來遂往見殿閣似藩邸並無王人有一僮子領公子出年十六禮畢趨就業聞義輒通一日聞拷楚聲私窺之見王者坐殿上劍樹刀山皆冥中事大駭而王者已知重笞僮子謂茨曰所以不見者以幽冥異路今知之勢難再聚贈以束金曰君天下第一人但坎壈未盡耳至是果如言

放螺螄報



先是明隆慶中長洲有韓侍郎世熊者世居陸墓甚貧祖永椿喜放生每早持帚掃兩岸螺螄盡放水中有時忍饑掃踰數里四十年不倦侍郎赴鄉試時夢金甲神告曰汝祖放生功大當令汝入翰林官至少宗伯使朝鮮賜一品服從此累代貴顯至康熙癸丑葵遂登會狀是科榜眼王度心改名鴻緒字季友婁縣人官至工部尚書著有明史稿 國朝修明史取為藍本採花徐秉義字彥和崑山人乾學弟官至閣學 上南巡賜 御書恭謹老成四字 南書房供奉之始

康熙十二年癸丑春 天子御講筵從容與學士言朕欲得文學之臣朝夕置左右惟經史講誦是職給內廬以居之不令與外事其慎擇醇謹通達者以聞時舉丁未科進士編修桐城張英名入對 上心識之自是再四諮詢對者無異詞迄十六年丁巳冬有內廷供奉之命賜邸舍于瀛臺之西辰而入終成而退乾清宮之西南隅曰南書房上舊所御讀書處也命處其中飲饌給于大官執書使中涓筆墨側理器具之屬皆取于御府珍果饌饕之撤自御饌者日數至焉 御乾清門聽政後則名至懋勤殿辰巳前



淡墨錄  
講經書午後讀史官至大學士卒謚文端有存誠堂集

三鼎甲兩尙書

彭定求字勤止隴子康熙丙辰會狀表章湯潛菴遺書敦行善事弟寧求字文洽康熙壬戌探花定求孫啟豐後八年復登會狀祖孫濟美爲吳中盛事是科榜眼胡會恩字孟綸德清人明友信之裔也 上問以對 賜友信名文實政四字懸于家廟著有清芬堂集探花翁叔元字寶林常熟人官至刑部尙書著有鐵菴文稿梵園詩集三鼎甲兩尙書亦盛事也

一匡天下

陳介眉錫嘏鄞人生而夙慧入小學讀孟子至百里奚不諫作論非之十五入庠康熙十四年解元其題爲子謂子產一章元破云學可匡時得一人以風天下也人以爲關節是一匡天下四字其事密然其文實佳且平生留意格物致知之學無足疑也丙辰進士選庶吉士官止編修

京堂翰詹服色

任宏嘉字葵尊宜興人康熙丙辰進士由行人改御史上疏定服色三品以上始許衣貂裘舍利蘇王士



禎口占戲贈云京堂詹翰兩衙門齊奪貂裘舍利繇  
昨夜五更寒徹骨滿朝誰不怨蔡尊見香祖筆記

由部員改翰林自顧八代始

顧八代字文起鑲黃旗人以軍功授戶部筆帖式擢  
吏部文選司郎中康熙十四年 聖祖御試旗員

擢八代第一遷翰林院侍講學士自他職改補翰林  
官實自顧八代始後二十三年 特旨入內廷侍諸

皇子讀書

世宗與焉尤敬禮之官至禮部尚書

講筵得正人  
康熙十八年己未狀元歸允肅字孝儀常熟人授修

撰兼日講官進講周易毛詩舉止端詳敷奏明暢湯  
斌歎曰講筵得正人天下有賴矣陞中允

宣城梅瑞

康熙己未榜眼孫卓字予立探花郝薦馨字楚畹皆  
宣城人先是宣城科甲不盛人謂文昌閣久廢故商  
新之己未孫菲連名鼎甲入翰林而施閏章阮詠復  
以鴻博入同時四翰林時施園有梅三月復開四花  
其方位恰應四人所居人以為異孝廉梅清繪為圖  
得罪神明

趙作舟字浮山大嵩衛人順治甲午解元乙未公車



入京居汾陽館館祀有關帝像作舟偶于像側挾妓  
其父在里夢偉丈夫告曰吾潘姓乃關帝下值日功  
曹也爾子應今科入翰林以近日得罪神明罰科矣  
作舟下第歸入門父述其夢作舟悚然踴躍二十四  
年署東平學正康熙十八年己未始登進士入翰林  
改庶吉士見秋燈叢話

白帽

南宮張光豸康熙戊午赴鄉試時父病不欲往強之  
行至旅店夢人送一白帽子心惡之欲歸而父書至  
病良已遂終場歸家見父而報人已至則光豸領解

元矣明晨賀客麇至一客忽云邑中自前明兵部尚  
書白圭領解後久無繼者君能繼之故見之夢光豸  
始恍然十八年己未進士改翰林庶吉士

父子與宴

桐城大學士英長子廷瓚康熙己未進士殿試二甲  
第二名由庶吉士授編修兩歲中遷至侍讀學士乙  
亥六月上召翰詹八人至暢春園賜宴賜扇英  
父子皆與焉丁丑命祭南嶽告假省墓廷瓚自十  
歲入京三十餘年始得展祖家中伯叔多不相識也

集韻牌詩



合肥文定公子李孚青字丹壑年十六登康熙己未進士入翰林授編修毛西河時在文定宅每翻韻牌作詩值雪霽集飲手拈一牌偏值雪字有翠嶂雲俱合平橋雪未乾句坐客皆閣筆一日秋節剪新袍成毛西河邀同直起居注適檻前乾鵲噪毛戲曰絮鵲早催忙入館丹壑見旗人着綠應聲荅云臂鷹秋遣窄裁衣毛不覺折腰曰才子才子

父子兄弟翰林

崑山沈世奕己未進士子旭初丙辰進士朝初己未進士皆官編修時父子兄弟並在翰林時人榮之

長生殿

益都趙執信字秋谷康熙十八年己未進士年十六入翰林爲贊善恃才傲物時長生殿院本盛行秋谷素所咨賞會國恤止樂大紅小紅已浹日而織練未除顧大集諸名士徵歌縱酒言事者倚撫入奏各譴責有差秋谷坐是削籍年未三十家居垂五十年嘗有可憐一夜長生殿斷送功名到白頭之句

翰林不由科甲

錢塘高澹人士奇以詩受知聖祖不由科甲  
欽賜翰林官至詹事陪宴唱和扈從不離左右恩



寵無比亦異數也有扈從銷夏等集嘗有句云隨行  
漫逐栖梧鳳下筆爭如食葉蠶蓋言其不由科甲也  
歸養別舊詩云鶴禁森嚴地絕塵崇班自昔簡儒臣  
詎知烏鳥私情切翻荷龍鸞 寵命新謝琰光榮叨  
異數王恭妙選媿前人鑑湖一曲堪投老青綬垂腰  
許乞身永北花南有舊廬閒園將母日方舒探懷香  
喫千頭橘入饌肥烹二寸魚芝檢排窠邀國典松窻  
流耀捧天書只憐鴻案塵生久八座同誰問起居又  
有待把遭逢誇野老瓦盆泥飲語昇平亦佳話也

翰林放學政之始

康熙庚辰臘月 特命翰林院侍讀汪灝提督山西  
學政初以翰林官出視學政惟直隸爲然康熙二十  
年以江浙人文之藪亦用翰林他省仍舊改用翰林  
例自此始

庶吉士舉人典試之始

自己卯順天鄉闈乾清門覆試舉人後直省考試官  
自侍郎以下槩行開列恭候 欽點壬午鄉試以副  
都御史張睿主考陝西御史吳甫生副之吏部文選  
郎中陳汝弼主考江南工科給事中黃鼎楫副之御  
史傅作楫主考浙江翰林滿洲阿爾賽副之湖廣巴



海大理評事山東滿保河南傅森皆翰林滿洲人山西孫致彌戊辰庶吉士傅作楫舉人副都御史御史庶吉士舉人典鄉試自是科始

會試分省

禮部會九卿題爲會試關天下之人材閱卷宜照從前之定例舊例分南北中卷衡量可謂至平又分左右未免分析太繁相應仍照舊例南北卷內不必細分左右將廬州等府潯州等州舊係中卷者俱歸于南卷其雲南貴州四川廣西四省去中卷各色每科雲南定爲雲字號額中二名四川定爲川字號額中

二名廣西定爲廣字號額中一名貴州定爲貴字號額中一名康熙三十九年會試奉 恩詔加額明年會試應將雲南四川各加中二名廣西貴州各加中一名庶人材不致淹抑而遠方士子皆得均沾 皇恩矣奉 旨依議

五經不禁

壬午順天鄉試五經監生二人一莊令輿江南武進人一俞長策浙江桐鄉人初以違例做五經貼出仍具題請 旨奉 旨俱著授爲舉人准會試嗣後願做五經者不必禁止



老先生

王阮亭云京官舊例各衙門稱謂有一定儀法不可  
那移如翰詹稱老先生吏部稱選君印君員外以下  
稱長官科稱長科道稱道長是也自康熙丙子祭告  
回京見聞頗異各部司及中行評博無不稱老先生  
者矣



先生

王既亭云京官舊例各衙門稱謂有一定儀法不可  
那移如翰詹稱老先生吏部稱選君印君員外以下  
稱長官科稱長科道稱道長是也自康熙丙子祭告  
回京見閩頤異各部司及中行評博無不稱老先生  
者矣



